



EDITORIAL

Mabayanihon nga pag-ato ha rehimen Duterte, dugang nga papintason kontra ha rehimen Marcos II

Ha maabot nga Hunyo 30 nakatalaan an pagtapos han presente nga termino ni Rodrigo Duterte ngan an pagtikang han termino ni Ferdinand "Bongbong" Marcos Jr. Hini nga adlaw ha magkalain-lain nga parte han nasud, nakaandam an katawhan Pilipino nga iglansar an hiluagan nga mga gios-protesta komo pabalon ha tikahuman nga rehimen Duterte, ngan tapo ha malingkod nga rehimen Marcos II.

Grabe an kangalas han katawhan kan Duterte ha kadamo han iya ginpatay, gin-gipit ngan ginpamingaw, ha kadako han karikuhan nga iya ginkawat, ngan ha grabe nga pagpakuri ha ilarum han iya tiraniya. Narunapulo kayukot an iya ginpatay ilarum han iya mga gerra kontra druga, kontra Moro ngan kontra ha rebolusyunaryo nga kagiusan, ngan gin-gipit an mas damo

pa. Ginmilitarisa niya an sibilyan nga gubyerno ngan gintagan hin poder an militar ha waray katupong nga balitang ha tuyo nga paluhuron an tanan ha iya tiraniya. Ginkorap niya an bilyun-bilyon kapisos, ginbangkrap ngan ginlubong ha utang an nasud, ngan ginludlod ha grabe nga kakurian an katawhan. Ha yana, hi

"Mabayanihon...", sundan ha paypay 2

14 kaswalti han AFP kontra ha BHB ha Las Navas

DIRI MAMENOS HA 14 an kumpirmado nga kaswalti han mga pasista nga tropa han Armed Forces of the Philippines (AFP) ha susrunod nga armado nga agway hini ngan han Bagong Hukbong Bayan-Rodante Urtal Command ha Las Navas, Northern Samar hadton Hunyo 3-22.

Tulo nga sundalo an namatay ngan pito an samaran ha aktibo nga pagdepensa han BHB kontra ha mga tropa han 87th Infantry Battalion ha usa nga umhanan nga lupgop han Kilometro 9, Barangay San Isidro hadton Hunyo 3. Mabulig unta ha pag-uma an usa nga pamproduksyon nga tim han atentaran hira nga atakihon han mga pasista nga tropa. Dapit alas-10 han aga, naunahan nira nga pabuthan an kaaway nga nandadlagan ha kahadlok. Nakaatras hin waray kaswalti an Pula nga hukbo.

Nakaengkwestro naman han BHB-RUC an mga nag-ooperasyon nga tropa han 87th IB hadton Hunyo 9 ha bawnderi han mga barangay han Caputoan, Paco ngan Poponton dapit alas-7 han aga. Duha nga sundalo an dinalagan dayon nga diri pa nakakapabuto an mga Pula nga mangaraway. Naunahan hini pabuthan an mga pasista nga tropa ngan talwas nga nakaatras.

Hadton Hunyo 15, naunahan pabuthan han BHB-RUC an mga nag-ooperasyon nga tropa han AFP ha usa nga bulod ha gawas han Barangay Caputoan dapit alas-10 han aga. Waray maigo an mga Pula nga managaraway han makabulos na hin

"14 kaswalti...", sundan ha paypay 2

Komunidad han mga katutubo, gin-okuparan han militar

Tanan nga katutubo nga Mamanwa ha usa nga sityo ha Northern Samar an gintabrog han 8th Infantry Division han Armed Forces of the Philippines (AFP) kahuman hini himuon nga *tactical command post* an komunidad para ha usa nga tinagdako ngan nakapokus nga panmilitar nga kampanya.

Tikang pa hadton Mayo gin-okuparan han mga pasista nga tropa han 8th ID an Kilometro 7, Barangay San Isidro, Las Navas, agud himuon ini nga sentro han ira operasyon ha pagsulaysukay ha kagugub-an han Barangay San Isidro ngan kasapit hini nga Barangay Sag-od. Gintatantiya nga 400-500 nga pasista nga tropa an ira ginmobilisa.

Hasta yana waray pa makabalik ha ira lugar an mga katutubo sugad liwat an mga residente han kasapit nga Kilometro 6. Dako na nga destroso an gindurot han paggarison han militar ha ira murayaw nga pag-ukoy ngan pagpakabuhi. Waray na gud hira makag-uma, makapanguway ngan makapamanwa ha palibot nga kagugub-an tungod ha okupasyon ngan presensya han militar.

Syahan na nga napiritan mag-e-bakwet an mga residente han Kilometro 6 ngan 7 hadton Enero han maglansar liwat hin dako nga panmilitar nga operasyon an 8th ID ngan magmobilisa hin gintatantiya nga 600-800 nga pasista nga tropa agud

magsulaysukay ha pareho nga kagugub-an. Hini nga operasyon, wala-tuo an ira panalapas ha tawhanon nga katungod han mga katutubo ngan parag-uma. Naundang liwat an tanan nga pagtrabaho ha uma.

Kadungan han mga operasyon ha kagugub-an an operasyon nga Re-tooled Community Support Program o RCSP ha sentro han baryo han San Isidro. Ginpatawag han mga sundalo an mga residente, kaupod an mga naukoy ha umhanan, ngadto ha ginkakampuhan nira nga *barangay hall* para ha pwersahay nga interrogasyon ngan "pagpasurrender." Antes hini, pwersahay liwat hira nga ginpatambong ha "peace rally." Ginkordon han mga pasista nga tropa an bug-os nga baryo usa kaadlaw antes an rali agud seguruhon nga waray makagawas ngan tanan nga taghimaryo mapatambong. Hugot nira nga kabulig an traydor nga hi Carlos "Chris" Baluyot ngan an impiltrador nga hi "Jeric" ha panarhug ngan pagpasurrender ha mga residente, ngan ha paggiya ha mga operasyon han mga sundalo. ■

"14 kaswalti...", *tikang ha paypay 1*

buto an mga sundalo. Diri nakauniporme ngan nakasul-ot la hin kamisa-tsino an mga nag-ooperasyon nga pasista. Kahuman han agway, nagsarang an mga gapas ngan mga higamit panlimpyo hin samad ha gin-atrasan han mga sundalo.

Upat naman nga tropa an nahia-guman nga kaswalti han AFP ha tak-tikal nga opensiba han BHB-RUC ha gawas han Barangay Sag-od hadton Hunyo 22 dapit alas 12 han udto.

An mga operasyon han AFP ka-parte han gintatantiya nga 400-500

nga kusog-tawuhan nga nagsusulaysukay hini nga magsaragpit nga mga baryo han Las Navas tikang pa hadton Mayo. Ha dayuday, gin-okuparan nira an mga balay ha Kilometro 7 komo *tactical command post* para ha ira panmilitar nga kampanya. Damo nga molupyo ha iba nga baryo an waray na makatrabaho ha uma tungod ha presensya han mga sundalo. Dirudiretso liwat an pagpalupad hin *drone*, pansarbeylans nga idro ngan helikopter han pasista nga AFP ha nasering nga mga lugar. ■

"Mabayanihon...", *tikang ha paypay 1*

Duterte na an pinakagrabe nga niyutiyo nga liningkod ha Malacañang.

An sobra nga pag-inantos han katawhan ha ilarum ni Duterte, nagduduso ha katawhan nga igpadayon an pakigbisog kontra ha tanan nga naglalarang nga igpadayon an iya mga ginhimo, sugad han masunod nga niyutiyo nga hi Marcos Junior. Yana pala, klaro na nga igpapadayon la niya an mga palisiya ni Duterte. Sugad ha iya, "nagdaug" hi Marcos pinaagi han panlibo, panguwat, ngan pandarahug. Mas grabe pa, karuyag niya mahingalimtan an mga krimen ha daan nga diktadura nga Marcos ngan makabalik gud an ira pamilya ha paghahadi. Ha mata han katawhan, diri lehitimo an rehimen US-Marcos II ngan kinahanglan ini purisigido nga atuhan.

Katin han katawhan an mga leksyon tikang ha unom katuig han militante ngan mapintas nga pakigbisog ha ilarum ni Duterte. Nanalinguha hira nga ungawan ngan mahibaro tikang ha kada ginpakusog nga pag-atake han naghahadi nga estado ngan han imperyalista nga agaron hini. Aada ha ira an mga gamhanan nga armas – an Partido, Hukbo ngan nagkakaurusa nga prente – sanglit sigurado nga malalahusan nira diri la an rehimen Duterte kundi an ngatanan nga masunod nga niyutiyo nga rehimen tubtub ha mapabagsak ngan masaliwnan an dunot nga naghahadi nga sistema.

Ha ilarum han bag-o nga rehimen, matikagrabe pa an panmuypoy kontra ha tanan nga pag-ato ha butnga han dugang nga paghilarum han krisis ngan pagkadunot han naghahadi nga sistema. Kinahanglan tugbangan ini hin mas mapintas nga pakigbisog han katawhan. An Partido, Hukbo ngan mga rebolusyunaryo nga pwersa an pinakamalalauman nira nga manguna ha mas gitgitay nga pakig-away, mas magkuri nga kamutangan, ngan mas dagko nga sakripisyo. Aada ha ira an kadig-on agud determinado nga hasugon an dalan han nasyunal demokrati-ko nga pakigbisog, padig-unon an ira ranggo, ngan sumungsong ha kada uranos, ngadto ha makatadungan nga kabubwason. ■

Dedlayn han AFP ngan PTF-Elcac ha Northern Samar, ginpakyas han BHB

Ginpakyas han Bagong Hukbong Bayan (BHB) an tinagdagko, nakapokus, ngan magastos nga operasyon militar han AFP-PNP ha Northern Samar hini nga ikaduha nga kwarter han tuig. Desperado an militar nga makab-ot an ira dedlayn nga puypuyon an rebolusyunaryo nga kagiusan antes mahuman an termino ni Duterte ha Hunyo 30.

Nakapokus ngan tinagdako nga atake

Hadin Marso 31, nagpatawag hin miting an Provincial Task Force-Elcac han Northern Samar para ha ira kampanya kontrainsurhensiya ha urhi nga tulo kabulan ni Duterte. Gintarget dinhi an 229 nga komunidad ha prubinsya nga "malimpyo" ha impluwensya han BHB, agud puuhon an kunuhay tulo nga nabibilin nga prenter gerilya ha prubinsya.

Ha Las Navas, diri mamenos ha 400 nga berdugo nga pasista an gindeploy para ha usa nga dako nga panmilitar nga operasyon ha higrani nga baryo han San Isidro ngan Sagod hadton Mayo. Nagtikahiluag pa ini nga operasyon ngadto ha iba pa nga mga baryo.

Utro naman nga gin-okuparan han AFP-PNP an magkaranit nga mga baryo han San Antonio, Catotoogan, Imelda, Quirino, ngan Aguinaldo. Aktibo an ira pagpasurrender dinhi ngan gindakop an usa nga *barangay health worker* o BHW han Barangay Catotoogan hini nga bulan han Hunyo. Padayon gihapon an ira pangampo han Barangay San Miguel, Barangay San Francisco, ngan mga apiki nga baryo.

Hadin Abril, naglansar hin panmilitar nga operasyon an bag-o nga deploy nga 3rd Infantry Battalion ha Barangay Lakandula. Gin-operasyunan gihap yana nga Hunyo an karanit hini nga mga baryo nga Poponton, Caputoan, Victory, Taylor, L. Empon ngan Paco. Aktibo nga kabulig han militar ha saywar ngan pag-operasyon hi JR "Papay" Jarito.

Ha mga bungto ha erya nga Pacific, maabot ha 63 nga barangay dinhi an ginlasurbo han gintig-ob nga mga pasista nga tropa han AFP ngan PNP tikang pa han naglabay nga tuig. Wala-tuo an saywar nga pagpasurrender ngan pan-gigipit ha katawhan ha porma han interrogasyon ngan pangangilan pagsarbey, pagpirit ha barangay konseho nga iglakip ha "persona non grata" an mga gin-red-tag nga parag-uma, panarhug hin *shoot-to-kill order*, pag-obligar nga magpaatendir hin mga "peace rally," ngan iba pa nga pasista nga larang. Hugot nira nga kabakyang an mga traydor nga hira Dodong "Ras" Baluya ngan Renato "Manoy" Rebay ha pagpasurrender ha mga sibilyan.

Kundi ha luyo han wala-tuo nga pangampo, pandarahug, panalapas, panarhug, panguwat, pagbinuwa, panhugay, panmomba, ngan iba pa nga porma hin brutalidad han estado, mismo an 803rd Infantry Brigade an nag-amin han ira kapakyasan han igpahayag hini nga maabot 26 la nga komunidad ha Pacific an ira "nalimpyuhan."

Hugot nga sumpay


Ha atubangan han pasista nga todo-gerra, ginpabuylo liwat han RUC an mga taktikal nga opensiba ha urhi nga tulo kabulan ni Duterte.

Hadin Abril 2, ginbirahan han RUC an bag-o nga deploy nga 3rd IB kun diin duha an patay nga sundalo ha Barangay

Lakandula, Las Navas. Hiton liwat nga semana, naghimo hin mga taktikal nga opensiba ha giutan han Barangay Osmeña, Las Navas ngan Barangay Senonogan de Tubang, Silvino Lobos kontra ha 19th IB samtang gin-ambus naman han RUC an mga tropa han PNP ha Barangay San Miguel.

Hadin Mayo 10, ginsirutan han BHB-RUC an tim lider han mga tropa han 20th IB nga nagkakampo ha Barangay San Francisco, Las Navas. Naghimo liwat hin taktikal nga opensiba ha Barangay Osang, Catubig hadton Mayo 8. Susrunod liwat an mga kadaugan han BHB-RUC ha mga armado nga agway kontra ha AFP ha iba nga baryo han Las Navas hadton Hunyo 3-22.

Sering han BHB-RUC, pakyas an rehimen Duterte nga puypuyon an rebolusyunaryo nga kagiusan ha Northern Samar tungod kay hilarum ini nga nakagamot ha masa. Ha butnga han panhibang han rehimen Duterte ha mga panmasa nga organisasyon ngan pambuhag han ira pagkaurusa, mahimuon nira nga ginsalikway an mga pasista ha magkalain-lain nga porma han pag-ato samtang maisugon nga gin-atubang han Hukbo an mga pasista nga operasyon ha urhi nga mga adlaw han rehimen US-Duterte. ■



BAGONG HUKBONG BAYAN
NORTHERN SAMAR
RODANTE URTAL COMMAND

Paghitaas han presyo han lana, doble nga pakuri ha kabaryuhan

Luun-luon an ginpapas-an nga kakurian labina han mga kabras ha kabaryuhan ha urhi nga bulan han rehimen US-Duterte. Ha sakob la hin pira kasemana, doble nga pagringgal ngan waray katupong nga pabug-at ha panginabuhi an ira gin-aantos ha matag-adlaw.

Ha tay-aw nga baryo nira Jose, 23 anyos, sobra 100% an igin-umento han presyo han *kerosene* (mas kilalado nga "petrolyo") nga aada na ha ₱450 kada galon samtang ₱440 naman kada galon an presyo han gasolina nga hadto naabot la ha ₱200.

Tungod ha doble nga umento ha lana, doble gihapon an iginhitaas han pasahe ha *pump boat* (de-motor nga bote) nga amo la an ira moda han transportasyon ngadto ha bungto. Tikang ₱100, aada na ini yana ha ₱200 kada pasahero. Ngan kun hadto libre an pagsakay han kabataan, lakip na hira yana nga ginsusuktan hin ₱200 kada biyahe.

Diri harumamay an kalugian ni Jose ha pagtransport pala han iya humay ngan kopras nga ginbabarat pa han mga komersyante ha bungto. Ha ira baryo, aada ha ₱3 an patong kada kilo han produkto (humay ngan kopras) o porlomenos ₱150 kada sako an gastos kun igsasakay ha *pump boat*. Kundi kun nag-iiha an huraw ngan nahuhubas an salog, iginsasabak ini ha patong nga ₱10 kada kilo o ₱500 kada sako. Papaliton la an sako han humay hin ₱700-₱1,000 o ₱14-₱20 kada kilo han mga negosyante ha bungto samtang pabarubag-o an presyo han lukad nga nagmumulay yana ha ₱35-₱40 kada kilo.

Gutom ngan kakablasan an gin-aantos han ira pamilya labina ha kassumpay nga paghitaas han presyo han pagkaon. Aada na ha ₱120 kada gantang o ₱2,400 kada sako an presyo han bugas nga hadto aada la ha ₱1,700 ngadto ₱2,000 ha syahan nga parte han tuig ha iba nga mga baryo.

Samtang unob na nga mahal an presyo han batakan nga papliton tungod han katay-aw han baryo, labi ini

nga nag-umento ha sakob la hin pira kasemana. Tikang ₱3, aada na ha ₱4 an presyo han itom nga kape (mas kilalado nga "stick") samtang aada na ha ₱11 an presyo han *3-in-1* nga timplahon; aada na ha ₱24 an presyo han sardinas nga hadto anay tag-₱20; tag-₱12 na an presyo han *noodles* nga hadto aada la ha ₱10; ngan aada na ha ₱20 an presyo han usa kaputos hin bulad.

Pasaro ni Jose, gin-aantum nira nga damo nga kabatan-unan estudyante an maundang ha pag-aram labina an maeskoyla unta ha aragtubang nga klase ha bungto tungod ha pagdoble han presyo han pasahe ngan pag-umento han papliton.


"[Samtang] nagpupulos hin super-tubo an mga hakog nga langyaw ngan lokal nga monopolyo kapitalista han lana... an waray hunong nga pag-umento han mga produkto nga petrolyo nagpapahitaas han gastos ha produksyon, transportasyon ngan presyo han pagkaon ngan iba pa nga panginahanglan, ngan nagluluros ha kalidad han kinabuhi han katawhan," sigon kan Marco Valbuena, upisyal ha im-

pormasyon han Partido Komunista ng Pilipinas.

Labot pa ha natikamahal nga papliton, sigon kan Jose, an pinakanakaringgal gud ha iya pakabuhi amo an diri pakabuylo ha pag-uma tungod han militarisasyon. Sugad han iba pa nga baryo ha Eastern Visayas, natikapintas an pagringgal han mga pasista nga tropa ha panginabuhi han parag-uma pinaagi han okupasyon ha mga baryo, pagtsekpoynt, paglimitar han oras han pag-uma, paglimitar ha kadamo han poyde paliton nga mga epektos, panarhug ngan *red-tagging* ha mga parag-uma, pwersahay nga pag-ebakwet ngan dislokasyon ha panginabuhi, ngan panganyon ngan panmomba ha ira umhanan.

Ha butnga han krisis ha ekonomiya ngan pasismo han estado, waray lain nga masasarigan kundi an pagkaurusa han katawhan, an burubligay ngan tiriklos ha produksyon, ngan pagdependensa ha mga kadaugan han agraryo nga rebolusyon. Kadungan han pagkampanya para ha pankadagmitan nga ayuda ngan pagtanggap han sobra nga buhis ha mga produkto nga petrolyo, kinahanglan ig-insister han taghimar-yo an katungod ha panginabuhi, muryaw nga pag-ukoy, ngan pagpalayas han militar ha kabaryuhan.

PRODUKTO/ SERBISYO	Mayo 2022	Hunyo 2022	Tantos han umento
Petrolyo	₱250	₱450	125%
Gasolina	₱200	₱440	120%
Pasahe ha pump boat	₱100	₱200	100%
Kape ("stick")	₱3	₱4	33%
Kape ("3-in-1")	₱8	₱11	38%
Sardinas	₱20	₱24	20%
Noodles	₱10	₱12	20%
Gatas	₱13-₱15	₱20	54%



Paglingi ha mga krimen han diktadura nga US-Marcos

Sigon ha usa nga puplunganon, "Mahadlok ha kasaysayan kay waray sikreto nga diri hini nabubuksas." Ha utro nga paglingkod han pamilya Marcos ha pungkay han estado poder, buylo an ira paningkamot nga paraon ha kasaysayan an ira mga krimen ha katawhan Pilipino, kalakip adton panahon han diktadura nga US-Marcos (1972-1986). Agud atuhan ini, igagawas han Larab an pira nga estorya han pandarahug han pasista nga diktadura nga Marcos. Gin-aaghat an mambarasa nga magsubmitter han ira mga estorya han balaud militar, magsarusaruy ha kada tagsa nira nga komunidad, ngan igpasamwak ini ha hiluag nga masa.

Masaker ha Sag-od

Diri mamenos ha kwarenta y saís (46) katawo nga ginpatay, kaupod an kalalakin-an, kababayin-an ngan kabataan. Makarimadima an estorya han masaker ha Sag-od diri la tungod ha kadamo han ginpatay nga sibilyan han mga pasista nga militar, kundi ha grabe nga brutalidad ngan kawaray pagtahud ha tawhanon nga katungod nga haros nakaubos ha bug-os nga populasyon han baryo.

Kaagahon han Septyembre 18, 1981, nakaturog pa an taghimaryo han Sag-od han magpinabuto ha gawas han baryo an 18 nga armado nga pwersa han San Jose Timber Corporation, usa nga kompaniya ha pagtotroso nga pananag-iya han hadto anay sekretaryo ha depensa nga hi Juan Ponce Enrile. Ini nga mga pasista nga tropa kaparte han 70-katawo nga paramilitar nga grupo nga Civilian Home Defense Force nga nagios ha nasering nga erya. Gindeploy hira ha Samar agud kuno puuhon an Bagong Hukbong Bayan ha Eastern Visayas.


Ginpagawas han mga pasista an mga taghimaryo ha ira mga balay ngan gintirok ha atubangan han balay han kapitan. Ginbulag an kalalakin-an nga ginpapila ha plaza, samtang gindara an usa nga grupo han kababayin-an ngan kabataan ha gawas han baryo. Waray pa hira makahirayo han makabati hira hin bubto nga linastar hin 15 minutos. Waray bisan usa ha kalala-

kin-an an nabuhi.

Samtang, ginmandaran an kababayin-an ngan kabataan nga lumakat tipagawas han baryo ngadto ha guba. Inundang hira ha sapa nga Malapanit nga usa kakilometro an distansya tikang ha baryo. Nagpakiana ha ira an lider han mga pasista kun nakilala ba hira kan "Kumander Racel" han hukbo han katawhan. Han waray hira makabaton, pirit nga ginbulag an kabataan ha ira mga iroy. Kundi mas naghugot la an pagkapot han mga bata. Ginpanlugos han mga pasista an kababayin-an. Kahuman, waray kaluoy hira nga ginpangistraping kaupod an kabataan. Nagkolor hin pula an sapa han Sag-od.

Kwarenta y saís la an nakumpirma nga namatay kundi mas dako pa an aktwal nga ihap. Trese katawo an nakaeskapo ha madarahug nga masaker, kaupod hi Marela Yanay, 8 anyos, nga naigo ha ulo ngan nagpostura na la nga patay na. Ginpatay han mga pasista an iya amay, an iya burod nga iroy, ngan upat katuig nga bugto.

Bisan kun haros maubos an populasyon han baryo, waray ginawas nga balita hiunong ha Sag-od. Nahibaruan na la han publiko an pagmasaker ka-human magkamayda hin pag-imbetiga an Makabayang Kilusan para Isulong



ang Katarungan (MAKIISA-KA), usa nga alyansa para ha pagdepensa ha tawhanon nga katungod.

Hadton Nobyembre 1981, nagkamayda hin pampubliko nga pagbista hiunong ha masaker ha Sag-od ngan mga kaso han pangabuso han militar ha Samar, nga gintambungan han usa kayukot nga tawo. Nabalitaan ini han British Broadcasting Company o BBC nga nakabase ha nasud United Kingdom nga naghimo hin usa nga dokumentaryo hiunong ha Sag-od ngan ha iba pa nga kaso han pandarahug ha Pilipinas.

Grabe nga ginkangalsan han diktador nga hi Marcos ini nga dokumentaryo. Napahimuwa hini an ginpagawas niya nga "smiling dictatorship" (nakahiyom nga diktadura), diin murayaw kuno an mga tawo tungod kay binalik na ha normal an ira mga kinabuhi. Kundi nabuksas gihapon an madugo nga panhitabo han masaker ha Sag-od ngan an tinuod nga kamutangan han Pilipinas ha ilarum han balaud militar ni Marcos.

Sulog han Sag-od, Sulog han Pakigbisog

Luwa nga ginhimo hadton 2008 ha okasyon han ika-27 katuig nga paghandum han masaker ha Barangay Sag-od, Las Navas, Northern Samar.

Haganas han tubig, kusog han pakigbisog
Ika-15 han Septyembre 1981, ikaw ginbay-og
Puraok hin panginyupo, nguynogoy ug kulaog
Testigos ka han kasaysayan, linumos nga mga tingog!

Sadang na ba an magtangis; igo na la ba an magnguynogoy?
Inutang nga ginhawa – mga kabataan, amay ngan iroy
Tipaunan-o makakabangon tikang ha pagkamakaluluoy?
Panumduman nira Itay, Inay, Inday ngan Nonoy!

O, Salog han Sag-od, salog nga makusog,
Paabya kami han imo tubig, han imo sulog.
An imo daralwa, an imo agos
Susug-on hin pag-abid han amon pakigbisog!

Salog han katulinan, nagpapabilin ka nga saksi
Pag-awas han dugo han 46 nga kinabuhi
Ano an angay hini nga mapait nga kaagi?
Kab-uton an hustisya para han mga inosente!

Baynte syete katuig na an humagos
Mga ulat nan-gagataw pa ngan diri mahihimos
Padayon nga nagsusukot hin hustisya
Nangangandoy, nagguguliat nga igbulos, igbulos!

Sugad man katangkod han imo sulog
Tikang ha iraya, piho an pagpailawod
Kami nga imo mga anak, takos, madig-on ngan mabakod,
Makikigrebolusyon kutob ha pagdaug!

